

中國方志叢書·華北地方·第二四二號


據未著纂修人姓氏

民國燕京大學圖書館鉛印本

影印

陝西

朝邑縣鄉土志



成文出版社有限公司印行



10098695

中華民國五十八年 月壹一版

朝邑縣鄉土志

全一冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市羅斯福路三段279之二號

電話：三七〇一三二二號

印刷者：東南印製廠有限公司

和平西路二段70巷83弄29號

內政部登記證內服台業字第一一四七號

朝邑縣鄉土志目錄

沿革表

政績錄

兵事錄

耆舊錄

人類

戶口

氏族

宗教

實業

地理

山

一

六

一〇

一三

三二

三一

三一

三三

三三

三四

三六

目錄

燕京大學圖書館

水

三七

道路

三九

物產

三九

商務

三九

朝邑縣鄉土志目錄

沿革表

政績錄

兵事錄

耆舊錄

人類

戶口

氏族

宗教

實業

地理

山

一

六

一〇

一三

三二

三一

三二

三三

三三

三四

三六

目錄

燕京大學圖書館

水

三七

道路

三九

物產

三九

商務

三九

朝邑縣鄉土志

在昔芮國今之鄉土
謹記舊聞從新述古

歷史

考經史並羣志書互
有同異只可互采

朝邑縣唐大歷三年置

朝邑之名雖創自西魏然
唐初屢變故斷以是年

沿革表

朝代

統部

本縣

未置朝邑縣以前

唐虞

雍

州

舜典肇十有二州禹
傳中古但為九州因
堯時沿水作貢亦其
舊舜始分為十二州
文獻通考顯帝創制
九州御批通鑑因之

<p>春秋襄七年王</p>	<p>周</p>	<p>商</p>	<p>夏</p>
<p>秦 秦穆公滅芮</p>	<p>秦 史記秦歸晉侯夷吾夷 吾獻其河西地是時秦 地東至河</p>	<p>王 畿 詩桑柔序芮伯刺厲王 孔穎達曰是畿內諸 侯為王卿士也</p>	<p>雍州 禹貢黑水西河惟雍州 愚按韓邦靖朝邑志 作冀州恐據晉獻河西 地於秦然亦安知非晉 之先吞秦耶即原晉地 疑仍屬雍州</p>
<p>王 城 春秋左傳晉陰飴甥會 秦伯盟於王城杜注 秦地馮翊臨晉縣東有 王城彙纂今在朝邑 縣</p>	<p>芮伯國 欽定春秋彙纂今同州 朝邑縣有芮故城在黃 河西岸 又史記晉穆侯七年伐 條長安志條近朝邑</p>	<p>芮國 韓志云殷周時為芮國 路史在朝邑西南</p>	

<p>秦</p> <p>始 二十六年 皇</p>	<p>戰國</p> <p>威烈王 十七年</p> <p>安 十七年</p> <p>顯 三十九年 王</p>		<p>定 十三年 王</p> <p>貞定 八年 王</p>	
<p>內史郡</p> <p>以臨晉懷德屬</p>	<p>秦</p> <p>魏入河西地於秦 御批鑑作廿九年史記</p>	<p>魏</p> <p>出子獻公之亂晉復奪 河西地三家分晉屬魏 御批通鑑</p>		<p>秦</p> <p>左傳秦桓公伐晉次於 輔氏彙纂今朝邑縣 西北十三里有輔氏城 村愚按城在今小伏坡</p>
<p>臨晉</p> <p>今大荔朝邑兩縣地 括地志云懷德故城在 今朝邑縣西南四十三 里</p>	<p>臨晉</p>	<p>臨晉元里</p> <p>魏文侯伐秦築臨晉元 里史記</p>	<p>臨晉</p> <p>史記秦厲恭公伐大荔 戎取其王城築高壘以 臨晉國故名愚按與 春秋傳不同</p>	

<p>東漢 光武 建武元年</p>	<p>新莽</p>	<p>武 建元六年</p>	<p>七年</p>	<p>二年</p>	<p>漢 高 元 年 帝</p>		
<p>左馮翊 詔分馮翊以東西數縣為 左內史郡以東數縣為 本郡治臨晉魏略</p>	<p>左馮翊 關中復置雍州後罷復 置司隸晉地志</p>	<p>列尉大夫</p>	<p>左馮翊 改內史地志</p>	<p>左內史 分內史地志</p>	<p>內史 改二郡復內史地志</p>	<p>河上郡 分秦內史為渭南河上 二郡河上屬者九縣有 臨晉懷德地志</p>	<p>塞國 初項羽滅秦封司馬欣 為塞王地屬塞國漢 地志</p>
	<p>臨晉</p>	<p>監晉 改臨晉</p>				<p>臨晉 有芮鄉漢書地理志 南朝邑縣南三十里有 芮鄉北芮鄉括地</p>	

魏	晉 武帝	東晉 元大興二年帝	後孝 秦武	北魏 太武帝 神龜三年	真君元年
馮翊郡 <small>復置雍州 補三國疆域志</small>	馮翊郡 <small>雍州 晉地志</small>	馮翊郡 <small>十六國疆域志</small>		馮翊郡 <small>雍州 地形志</small>	華山郡 <small>寰宇記</small>
臨晉	臨晉 <small>改臨晉 元和郡縣志</small>	大荔	武鄉 <small>朱廷模朝邑志云於晉時為武鄉故杜預釋例云馮翊臨晉東王城今名武鄉城</small>	臨晉 <small>改大荔 十六國疆域志</small>	臨晉

<p>西魏 恭三年帝</p>	<p>孝文帝 太和三年</p>	<p>七年</p>	<p>澄城郡 領澄城朝邑五泉三縣 元和志</p>	<p>改華州為同州地志 改華山郡為武鄉郡 同州領武鄉澄城二郡 元和志</p>	<p>改華州為東雍州 隋地志</p>	<p>澄城郡 廢馮翊置華州治李潤 堡領華山澄城白水三 郡地志</p>	<p>分澄城郡置白水郡 地形志</p>	<p>澄城郡 地形志</p>
<p>廢三年帝</p>	<p>朝邑 改南五泉置 改為武鄉縣尋廢 王兆麓志</p>	<p>南五泉 改華陰分五泉縣地置 此地志</p>	<p>華陰 改臨晉 寰宇記</p>	<p>五泉</p>	<p>五泉</p>			

表

四

燕京大學圖書館

唐				隋		
元宗 天寶元年	太宗 貞觀元年	三年	高祖 武德元年	煬帝 太業初	三年	高祖 開皇元年
馮翊郡 <small>改同州 地志</small>	同州	同州	同州 <small>廢馮翊郡復置此領馮翊朝邑韓城郃陽白水澄城下邽七縣</small>	馮翊郡 <small>廢同州復置此隋地志</small>	同州 <small>廢武鄉澄城白水三郡以武鄉郃陽夏陽朝邑澄城蒲城白水下邽八縣隸同州</small>	澄城郡 <small>仍隸同州仍領三縣</small>
	朝邑 <small>省河濱地志</small>	河濱 <small>析朝邑郃陽兩縣地置唐書地理志</small>	朝邑	朝邑	朝邑	朝邑

						既置朝邑縣以後		肅宗 乾元元年 三年	
								同州 改馮翊郡 地志	
元 世祖 中統三年 十六年		金 熙宗 天眷三年		宋 太祖		五代		代宗 大歷三年	
同州 改京兆爲安西路 元地志		同州 立陝西行省治京兆 元史地理志		同州 隸永興鎮馮翊郡 宋史地理志		同州		同州	
朝邑		朝邑		朝邑 隸馮翊郡		朝邑 改河西 地志		朝邑	

<p>國朝 雍正三年 十三年</p>	<p>同</p>	<p>同</p>	<p>同</p>	<p>同</p>
<p>同州府 升凡十屬</p>	<p>州 直隸陝西布政司</p>	<p>州 改陝西行省為陝西承 宣布政使司</p>	<p>州 改奉元路為西安府 明史地理志</p>	<p>州 改安西為奉元路 元地志</p>
<p>朝 邑</p>	<p>朝 邑</p>	<p>朝 邑</p>	<p>朝 邑</p>	<p>朝 邑</p>

政績錄

晉

歐陽建字堅石渤海人爲政剛果甚有時譽人爲之諺曰渤海赫赫歐陽堅石其眞操如此

唐

劉幽求武彊人武后聖歷中舉制科中第後授朝邑尉神龍元年張柬之等舉兵討武氏之亂而武三思復爲司空幽求謂桓彥範敬暉曰三思尙存公等終無葬地若不早圖噬臍何及不從三思卒復亂唐殺五王景龍元年佐明皇討斬韋后等立睿宗遂以幽求參知機務睿宗將立太子疑不能決幽求曰除天下之禍者當享天下之福平王拯社稷之危救君親之難論功莫大語德最賢無可疑者上從之郭元振坐法幽求力救其死卒爲名臣世傳幽求墓在洿谷未之詳也

宋

鄭詒字正臣德安人仁宗時爲朝邑令會兵事起民力不堪詒按簿書裁度調劑

以均賦役而民得不困

陳堯佐字希元閩中人知朝邑有善政旋被誣徙去

元

吳珪字玉甫宜陽人至正十六年任朝邑尹廉正愛民在官九年德惠普施與民相安遂占籍邑之平羅村後遷南鹵村家焉

明

劉道立字成己杞縣人以進士成化十九年任朝邑故志稱爲政剛果立心平恕除弊興利民無不悅父老言道立十九歲在任凡九年始終一節後徵爲御史歷陝西按察司僉事

蘇槃字德新南陽人以舉人宏治六年至任居九年志稱廉謹不擾諸凡善政多所可紀庶幾良吏厚遇學子月給燈油資夜誦每漏下偕門童步學舍稽勤惰近所未有也

魏傑夏縣人以舉人正德五年至任志稱取與廉潔行縣不攜里長以市餅自給

渴則飲於途

許陳謨吳縣人以舉人正德九年至任單騎而來見事風生片言決獄號爲良吏王道字純甫陵川人以舉人正德十六年至任善緝盜因太陽諸里田圯於河白中丞公議從輕額許其折布又朝邑爲孔道不任供送建白得以郃陽澄城夫馬協濟

郃相字立之澤州人以舉人嘉靖三年至任爲人廉謹自持事事有條愛民如子爲百姓調停不傷財不害民延名師教督諸生革除一切弊政尤不宿獄訟曲直立判上官數游揚以勸鄰封爲御史高翔特建表忠祠又爲劉烈女建祠其知大體類如此

歐思誠字純甫薊州人以進士嘉靖十年至任才堪治劇下車法兩豪強故其稱曰西擒高漢東縛趙都風采凜然而害民者息焉

郭三仁字商賢蒲州人以舉人嘉靖十三年至任道士華道益以灘田投獻王府委高同知行勘三仁疾其侵牟百姓且長投獻風密屬衆庶大譟而前肩同知輿

將沈之河三仁佯怒而解之比事竟田予百姓三仁之力也初三仁以接壤不受私謁里人服其至公河中疾其太執執持信難矣哉

劉尙義字伯正汾州人進士以御史嘉靖二十年謫任爲人簡淡純樸居官以靜治又執持不撓以縣城狹小於是拓東城四門起麗譙人享其利官至河南副使任希祖字元孝蒼溪人進士以嘉靖二十四年至任爲人慈祥愷悌革除弊政有節用愛人之風厚遇博士弟子員月爲程督多所造就又建白冢鎮堡至今爲世利政平訟理郅相之後一人而已初里人以過柔少之君子謂其嚴不立威寬不縱弛希祖有焉

畢仕和石首人以舉人三十一年至任潛心理學專務以德化民訟者聽其和解不肯剖決稍決一事款款動人又雩而即雨屢雩輒效其誠一如此後轉調去實不持一錢蓋長者也

郭實字華伯高邑人進士爲人方嚴精敏以萬歷十一年至任發姦摘伏煥若神明大猾斂迹節里甲緩催科農民欣欣如也邑學舊無泮於是始作又修黌宮廣

社學擇師以教子弟蒲人侵地千頃渡河釐正蒲人譟呼而至不爲動卒正其界縣以東沙積如堂阜遇風旋而蔽天幾不可田資口食令人覆沙漸成沃壤丁亥歲凶盜將起令行禁止一境肅然並祀程編修濟於高御史表忠祠更名雙忠增祀李張二烈女於劉烈女祠更名三烈刻邑紳王學謨所纂邑志至今考文獻者徵焉任六年擢御史去邑之人如失慈母云

趙炳字虛白北直隆平人進士性寬平不尙威稜然事有害於民者爭之上官必得乃已往直指按同州供億派於五縣韓郃澄白直指不臨其境邑獨供之已重於州而又使貼州炳曰朝有役同無與今同苦而使朝肩之可乎力陳其不便遂罷之又議罷條鞭一事條鞭者變一切里役諸法而盡以銀征其弊利官而病民炳詳爲議上之獨不奉行民受其庇後條鞭法苛大爲民害人益服其遠識矣謝如尙湖廣耒陽人舉人繼趙隆平之後酌其寬而濟之以嚴懲姦護良邑境清肅有宦使者督織造於秦括取民膏檄下朝邑絲商若干家充行邑故寡絲貿自吳蜀苟順其意數十家破產不止也如尙身攫其怒抗而不應又上官欲陷故保

定通判某以屬如尙如尙曰殺人媚人壯夫不爲竟以忤上官意擠之罷去論者恤之然有愛在民久而彌思與郭趙二公同祠焉

羅任字幼衡光山人舉人機警精吏治能立解紛拏而端正潔白積穀罰鍰不以奇贏自私摘伏如神剔蠹無少貸邑之稱神君者必以羅公爲首他日量移知耀州州有顯者修府第役民苦且怨任野服荷畚鍤往役顯者謝罪役乃寢其挫強恤民皆此類也王方伯于陞作去思碑謂其廉仁智斷勤信有六善云

楊紹震字景廉山東東明人萬歷癸丑進士爲政卓然不苟從來縣轄於州州人恃強凌虐縣人紹震因民弗忍請於上官求直隸府事雖不果行而州禍從此息矣

王時英山西垣曲人以解首舉進士恤下傲上岸然自負而才足濟之侃侃而談旁若無人人無不改容禮重訟牒繁多應時立決雖急遽中動作從容聲譽大起調繁知長安迓者戲謂邑人曰公幸值下邑故能立名若到長安恐故步或失也及至則風裁卓卓加厲於朝論者以爲柔不如而剛不吐惟公不愧自萬歷末迄

今民間道好官猶稱王解元云

王喬棟字北愚雄縣人以進士天啓六年至任恂恂書生也善談名理慈祥愷悌時事棘民窮不忍於催科又雅不習趨承上官遂謝病去民遮留不得泣送載道鐫石以志遺愛後起復歷任至湖廣督糧參政遇難不屈而死

國朝

楊閔泰山東人順治時至任值兵興後民氣未蘇以簡靜廉愛與民休息督吏甚嚴皆悚然股栗畏服

羅人琮字紫蘿湖廣桃源人順治辛丑進士以寧波府推官改令朝邑康熙七年至任慈惠端雅念民疾苦力革宿弊時郵馬久爲民害詳請入廠官養巡檢弓兵十二名隸潼關衛工食私派朝邑久沿爲例又請永革河衝荒地千餘頃糧額銀三千七百餘兩詳題蠲免皆得如請歲省民財不貲民呼青天甲寅滇黔逆變羽檄旁午處置有方民不至大困制府白公亟獎其廉幹公餘課士所賞識者多登賢書詩歌古文聲馳當時與邑薦紳李河濱王松園劉三峯倡酬爲多邑人謂德

政文章我邑賢令推公第一內擢貴州道御史

陳昌言字禹欽山陰人例監康熙十九年至任在任十年修舉廢墜學宮察院城隍及村鎮社學皆次第營構邑有大事則集衆詳議而後行故一切不至病民稍遷信陽州牧以去

王兆鼇字東柱雲南甯州人康熙庚午亞魁四十三年由學正陞任廉明剛毅才優治劇纂修邑志加論跋初邑中差糧任里役催納沿弊滋多民力難支兆鼇創立三運擇鄉之公正者領之又令各運頭於每里舉里長一人經手完納諸弊盡息民受其澤後陞調河州知州去任時攀轅遮道至千餘人

永佑滿洲人慈仁簡靜愛民如子緩催科禮賢士凡有訟至必先令歸使其私爲解和如是者再乃爲聽斷誠心勸諭愷切指陳兩造帖服多自追悔以故胥吏蕭寂政簡刑清又邑有倉糧按年填換民甚苦之佑竟十年未嘗開倉不以領納苦民民爲肖像祀之卒於官樞歸鄉民泣送者如喪父母至今猶呼永青天焉

謝長清滇南人以進士道光七年至任廉能精敏勤政愛民甫下車剔革積弊緩

徵慎刑尤勤聽斷嘗潛出訪民間匪徒鼠竊者悉斂迹逃匿創修城內義學龍神祠並養濟院捐俸千餘金更嚴於課士誠心訓迪不循故套士林奮興文風爲之不振任朝邑兩次去之日邑人攀轅遮道無不感戴深恩焉

黃照臨字碧川湖南人舉人同治十三年至任廉潔勤敏政稍暇即潛至鄉區視民疾苦創立友仁書院延名師教諸生常躬親訓迪成就頗多聽斷明決兩造甫至即爲理問有可原必曲原之有可釋必速釋之未嘗拖累病民民不稱冤民獄常平倉地卑溼麥易紅朽按年出換買補攤費民怨其苦照臨即時稟請請憲以麥易穀籌定章程永免填倉外費閭閻至今頌揚不輟口

黃鶚字石臣湖南安化人以舉人光緒二年至任廉正清潔省刑罰緩催科尤重儒紳有要事必集衆詳議而後行丁丑歲大饑急爲籌賑救活生靈旋以邑內荒地數千畝稟請上憲暫免差糧又黃河在邑境西徙已久嘉道後衝塌彌甚征賦如額民苦無可籲告歷五十載前任黃照臨擬請豁免錢糧事未竟調去鶚初下車力請豁免額糧銀六百餘兩實惠均沾故任朝邑兩次邑民深感戴焉

兵事錄

夏

后啓征西河

竹書 路史夏有西河國 按西河國即縣境

周

桓王十二年秋秦師侵芮敗焉小之也

冬王師秦師圍魏執芮伯以歸 春秋左

傳

十八年秋秦人納芮伯萬於魏

左傳

惠王十七年春虢公敗犬戎於渭汭

左傳

水道提綱渭入河處即古渭汭也

襄王七年晉陰飴甥會秦伯盟於王城 左傳 秦歸晉侯夷吾夷吾獻其河西地是

時秦地東至河 史記

十六年晉侯潛會秦伯於王城秦伯誘瑕甥卻芮而殺之送衛於晉三千人 實紀

綱之僕

左傳

十七年秦伯師於河上將納王

左傳

按河上即縣境

定王十三年秦桓公伐晉次於輔氏晉魏顆敗秦師於輔氏獲杜回 左傳 按今小

伏坡村輔氏城旁又有交草村即老人結草處

簡王六年秦晉將會於令狐秦伯不肯涉河次於王城使史顆盟晉侯於河東晉

卻鞏盟秦伯於河西 左傳

貞定王八年秦厲恭公伐大荔戎取其王城築高壘以臨晉國更名臨晉 史記

威烈王十七年魏文侯伐秦又築臨晉元里 史記

赧王二年魏秦會於臨晉 史記

十三年秦及魏韓會於臨晉

漢

高帝元年還定三秦賜周勃食邑懷德 本傳 按懷德在縣境

二年二月自臨晉渡河降魏王豹 本紀 八月韓信益爲疑兵陳船欲渡臨晉而伏

兵從夏陽以木罌缶渡軍 本傳

獻帝十六年馬超屯潼關曹公勅諸將關西兵精銳强悍勿與戰而潛遣徐晃朱

靈夜渡蒲坂津據河西為營 魏志

晉

哀帝興寧二年苻堅自臨晉登龍門觀晉魏顥結草抗秦師處 前秦錄

孝武帝太元十五年臨晉縣數千戶叛應姚懿姚紹濟自蒲津擊叛戶大破之 晉

載記

西魏

文帝大統三年東魏寇龍門屯兵蒲坂造三浮橋渡河 文帝紀 按蒲坂之浮橋在縣

境十月周太祖大破齊神武軍於沙苑渭曲斬首六千餘級降者二萬餘人神武

夜遁追至河上復大克獲 周書文帝紀 按沙苑與河皆在縣境

六年二月柔然入寇詔諸軍屯沙苑以備之 北史

東魏

天平四年高歡將兵二十萬趨蒲津復引兵自蒲津濟河涉洛軍於許原西 御批

通鑑

北齊

天統中齊將彭樂與宇文護戰沙苑樂飲酒乘醉深入被刺腸出內之不盡截去復護入戰兵遂敗 本傳

北周

武帝保定四年十月帝幸沙苑勞師 本紀

隋

煬帝十三年唐遣陳演壽史大奈率步騎六千人趨梁山擊賊孫華等破之留戍

永豐倉 唐書本傳 按永豐倉在縣境 九月戊午華陰令李孝嘗以永豐倉來降庚申

高祖率軍濟河舍於長春宮三秦士庶至者日以千數丙寅遣隴西公建成司馬

劉文靜屯永豐倉 本傳

唐

高祖南過永豐倉是夜宿於臨晉洛渭合流之處渡於洛水上流苦於水淺船行不進其夜三更天甚晴霽忽然覺水暴長數尺逆流而上船泛深波得達津次乃

命所司祀洛渭並有事於華山 大唐創業起居注 按洛渭合流處在縣境

武德十二年二月帝如長春宮獵於河濱免朝邑今歲租賦 本紀

肅宗至德二年二月甲辰郭子儀及安慶緒戰於永豐倉敗之 本紀 賊安守忠壁

永豐倉子儀遣子盱與戰殺至萬級盱死於陣進收倉於是關陝道始通 本傳

德宗興元元年八月上命渾瑊駱元光討李懷光懷光遣其將徐庭光以精兵六

千軍於長春宮以拒之 通鑑

貞元元年馬燧渾瑊破李懷光於長春宮南遂掘塹圍宮城懷光諸將來降 八

月賊將徐庭光守長春宮 本傳

梁

太祖開平三年四月車駕巡於朝邑 冊府元龜

末帝貞明元年梁遣劉鄩攻同州晉遣李存審救之屯軍於朝邑 五代史 本傳

明

嘉靖三十二年北兵深入潼關兵使者張瀚移兵駐縣三月北兵去

崇禎末李自成寇至雷于霖據高阜修泰安堡寨以禦亂 本傳

國朝

咸豐三年夏粵匪陷山西平陽初辦團練朝邑練勇防河 同州府續志

同治元年壬戌七月大荔花門變起洩忿鄰邑殺人如麻見男老稚不留而不屑
裹脅勝保軍敗績九月猝圍朝邑縣城撲城至八晝夜邑令托克紳率民勇堅守
孤城岌岌將危時參將王永慶護守朝邑縣城恃以無恐賊轉撲西關泰安堡至
十餘日之久團紳雷五堃練民勇以兵法部勒堡人捍禦多方礮斃賊無算賊怒
乃以全隊來撲寨門門已焚矣火光燭天百姓急請參將王永慶來援永慶在城
下立斃賊數十賊復合隊圍之永慶復躍登城上號呼兵民揭屋瓦擊賊屋瓦幾
爲之盡而城寨卒賴以保全實王參將之力居多也後以將軍多隆阿軍來勦賊
西遁城鄉稍爲解嚴

六年四月朔捻匪爲花門所誘突至本境僞燕王魯王等蹂躪村鎮破堡寨搜崖
窰挖地窖在雙泉鎮利其有水草扎營六七日雖嗜殺不同於回賊而營盤至八

十里之寬威逼婦女焚燬屋宇擄掠民人度劉邊陲幾至四十餘日較回賊之殘虐殆又甚焉迨郭寶昌軍來埽蕩羣氛本境始一律肅清焉

耆舊錄

周

芮伯姬良夫

孔穎達曰芮伯周同姓國畿內諸侯爲王卿士

似述先世體國忠貞憂君無

道悲發詩章

見詩大雅桑柔篇

隋

鉗耳文徹大業六年爲恆山郡九門縣令邑人頌之爲立清德碑

唐

嚴譔字善思明天文善風角麟德中調襄陽尉親喪廬墓後擢監察御史武后方任酷吏誅宗室貴戚大臣數百家以譔爲詳審使公直敢言平活八百五十餘人原千餘姓羅織之黨爲之不振

申屠思恭呂昂唐書云事親居喪有孝行者

嚴司業其名莫考天寶中擢宏文生調參江陵府軍事以知永王璘有異志免去後遷國子司業有從祖姑世父母身沒絕嗣旅殯在越毀家護葬於其先塋時服其義

安抱玉世居河西沈毅有謀尤忠謹安祿山亂守南陽斬賊使擢陳穎節度使破史思明封涼國公進司徒卒諡昭武

元

王由義字仲方歷官至禮部侍郎初爲徽政院都事能抑內侍節浮費爲御史屢有獻替抗章論衛士縱牧躪民田由是行營無敢犯者

趙良明宏治中沮水嚙趙氏墓有石曰元皇慶二年旌表孝子趙良

郭均字叔平至正時由儒林郎尹郟旣去民爲立石頌德爲政重民務督課農桑開學延師教養子弟有害政蠹民與不率教者悉伏法一時訟簡盜息鄉村樂與爲善引甘谷水溉田千餘畝常平倉粟至四千斛

明

高翔有文學矜名節洪武中以明經爲御史建文時尤戮力戎事激發忠義靖難後文皇帝召翔翔喪服入見大哭語又忤旨遂族翔沒其產

程濟爲岳池教諭建文初上言某年月日西北兵起廷謂非所宜言遂下獄已而兵果起赦以爲翰林編修充軍師初濟與高翔並以明經徵翔厲名節濟好奇術及有兵事濟勸翔學其術翔曰我願爲忠臣也金川門破翔召濟同死難濟曰我願爲智士建文急濟從亡每遇險幾不能脫賴濟力得免從行數十年後莫知其所終

王良洪武中貢入太學歷官刑部右侍郎建文時以議減燕府人罪謫爲浙江按察使燕師入京聞之慟哭誓以必死會命使召良良執使者將戮以殉忽衆譟奪去良悉收諸司印嗟嘆久之妻問故良曰吾分應死顧思所以處汝耳妻哭曰君爲男子乃爲婦人謀乎自投水死良遂積薪戶外閉家人毋得出抱印闔室自焚死

周或洪武中爲給事中舉劾無所避諸大臣見或著緋衣即取青衣爲待罪具已

而果有論刺遷通政使或有譖其貪者下獄竟死籍其家惟米數斗布衣數件召訊其妻妻曰或自嗾不能盡忠故俸稍不入於家寄本司庫中上察其清忠立誅譖者以俸給其家命沿途有司致祭焉

楊恭洪武進士初爲刑科都給事當靖難師起朝議命師問罪恭疏言宜先遣使講和不宜輒行征討忤旨除爲縣幕成祖即位徵至除陝西布政使恭徒步之官廉得贓吏多所貶退居九年以廉貞終

周道永樂中爲御史征雲南總兵官餽貨寶峻郤之擢山西按察司僉事有惠政卒於官喪出衆庶遮道哭奠三日不得行

蕭斌正統進士爲通政宅心公恕事不避難門無私謁

楊洼天順舉人任獲鹿知縣以廉謹稱劉瑾用事棄官杜門謝客瑾敗人服其知幾清操益著

劉偉成化文水知縣邑多豪強前令往往債事偉以誠心直道爲理衆庶傾心向化境內訓治徵爲御史持法平允聞母病兼程遄歸得母子一訣居喪廬墓二年

足迹不至城市後出爲兗州府

韓紹宗字裕後號蓮峰成化進士歷官福建按察副使初在刑部明敏果斷執法正直不可干以私疏論時政多見俞允

樊資成化中任榮縣典史歲饑出俸作粥勸設賑濟羣盜嘯起督繕城池仍單騎往諭之羣盜以平民立去思碑榮之士大夫遊秦者多登堂拜謁有泣下者

馬驥成化進士汶上知縣廉明方正人不敢干以私可爲則爲不避當道竟以此去官山東通志祠名宦中

雷爵成化舉人歷官大名府同知貞廉自持行部蕭然匹馬果蔬自給時林縣馬郡守謂韓恭簡曰自雷先生貳郡我雖一言不敢輕發數年得嚴師矣

周瑄成化舉人道之姪順德府通判韓恭簡稱其世濟清白或介直道宣惠瑄謹篤

王喬字汝器宏治進士爲戶部主事出掌錢穀於古北口觀潮河川難守乃上禦戎策旣而請理京衛牧馬草場畜牧事房山豪民侵牧地按之且急豪民有輿援

盦不顧曰法當如是也爲員外會詔求直言疏列五十餘事尋爲郎中督儲遼東又條奏邊儲戰陣方略過山海關憲臣以誘殺勘邊士罪盦又疏言實非誘殺亟行功賞以激士心巡行諸倉輒疏便宜七事以事被誣謫阿迷州同知歲饑不請先發以貸饑者擢守和州辨冤抑導水利民戀之立生祠後爲蘇州府同知以直道忤時免歸

韓邦奇字汝節紹宗次子號苑洛正德進士學有本源自諸經子史及天文地理樂律術數兵法之書無不通究著述甚富累官南京兵部尙書時稱進無所跲退無所疚卒諡恭簡詳見明史本傳

韓邦靖字汝慶紹宗三子號五泉正德進士生而靈異號神童拜工部虞衡司主事奉部檄監十庫與奄人抗禮奄人絀服遷郎中詔求直言邦靖乃上疏極言時政缺失天子震怒奪官爲民後復起爲山西左參議革姦平獄權豪斂迹以前後上疏論列皆不報乃乞歸軍民遮道號泣不忍去著有朝邑縣志

牛斗字應宿正德進士嘉靖初徙兵部武選司郎中冒濫者賄於當軸兵書力爲

之地獨難於斗無門可入兵書百計欲斗爲委曲斗執不從終以此告歸

程範字君儀正德舉人判開封府不受餽金賈祝被殺道旁其事莫測範悉鉤發擒盜人稱神明堅完城池築隄七十餘里鄉人爲立遺愛碑以勁直不容於時公論惜之

王朝雍字仲和登子正德初授嚴州府推官多所平反作理刑銘嘉靖改元應詔言事勸上勤學禮下節用恤民行縣不受餽遺自爲市菜和粥人謂之王青菜陞澤州知州庫人以羨金嘗之立置於法又榜示條約罷不便民者數事青羊山盜起朝雍紀功隨征勦白當道曰伺險進兵兩省齊發使盜腹背受敵乃可逞也賊平如其策初軍敗朝雍陷賊中賊以仁德不忍加害郡人共詣神祈禱比送歸香煙四十里沿祠祭報進懷慶府同知懷人立去思碑後累遷按察司僉事

王朝塗字仲冕登三子進士初授三河知縣能遏權璫捍強寇以廉能著

王學古字子獲號渭汀嘉靖進士爲壽春知縣調廣宗以治行第一擢判順天府尋遷刑部員外郎見罪人每泣下多爭獄於上官及調戶部郎中清苦自砥疏辨

空頭敕餽賜忤中官出知漢陽府地衝繁又多盜乃纂簡明圖說檄丈田均賦役
嚴保甲緝盜賊期年大治去官輕裝就道著有甌覆集

王學模字子揚號河汀學古從弟嘉靖進士初知大谷縣持己廉潔明於摘發威
令大行俗爲一變他縣訟不決者皆願移質大谷遠近稱神累遷左參議分守山
西河東稱譽藉甚然以不能俯仰乞歸同時達人稱其振救窮人力除貪墨所著
有被褐子等集朝邑志八卷

翟吾道字宗儒嘉靖舉人爲崞縣令崞故貧瘠健訟而逋賦抵任數月治理整肅
俗不擾而輸賦最有衛輝盜劫官帑誣連滑縣大姓一縣皆驚吾道抗言證其無
辜大姓得免其剛毅有執類如此

王三省字誠甫朝雍長子嘉靖進士歷官彰德府知府善馭宗室事事不因循滋
弊亦不更張立異務在便民法加於豪強惠施於惇嫠聲稱益著尋以疾乞歸築
太樸園讀書其中蓋棺時有書數千卷而已

嚴天祥字叔善嘉靖進士初授絳縣三年徵去一錢不著於身去之日父老遮道

攀留者以千數天祥持法不假借常約束吏胥兢兢不敢縱以此百姓戀之後選爲四川道監察御史

段朝宗字公見嘉靖進士拜給事巡視京營條奏防秋八事多見施行後知徽州府婺源盜方張曉以禍福皆相悔悟盜應時解散作諭數十條力行教化訟者至庭導之悔悟風俗遂變徽人立祠祀之

雷大道字行卿萬歷舉人知廣靈縣歲大祲極意拊綏捐俸以賑懇荒田數千頃遷兗州府通判署府事核糧儲卻常例數千金乞養歸性孝友田廬推善者與兄及兄子自取僅足蔽風雨供饘粥女兄弗瞻迎養五十餘年愛敬如一日居鄉與物無競好施與遠近咸推尊焉

雷士楨字國柱萬歷進士少穎悟有風節初授太常博士搜討故實作太常考八卷後遵用焉又修九陵祭器遂簿定之後巡中城宦官皆相戒勿觸禁已復巡漕運弁多覓京貴人書求薦士楨無所徇年四十以疾乞歸聚書萬卷日事校讐四方多就學者性孝友中年益篤每謂子弟惟儉則窮可以無求達可以助廉及卒

家至貧無以營葬焉

郭如魯字唯一進士年十六爲諸生時父客死河南裹糧步險負骸而歸後教諭平遙歲荒盡捐廩米以賑授東昌府同知攝清源不使內外有所關通加封識以待來者聲望大起

張徵音字祚康萬歷舉人授河南孟縣作隄以障黃河稱張公隄調寶豐政務優閒感時稗政作旁觀抵掌等書初在山右城守禦盜用鉦鼓柝鈴四物辨方向後遵用之知略輻輳有當世才限於資格不得竟其志

王嗣美字實之萬歷進士授太原推官以明允稱擢南戶科疏論侃直又條時政缺失忤政府意調山西河南道宗人暴橫嗣美按發如律藩府斂迹擢江右糧儲參政徵發押運索耗之弊剔杜一清調補荆南提督時羽流數千人皆有輿援摘其渠魁正法輿論快焉乞病歸薦起再補河南值事急兼攝兵道又條攻守要務矢自効用不報陞山東按察使予告歸著雜集十二種

王暉如萬歷舉人授鄖陽同知值歲荒爲分地立限以賑再補永平攝欒州特建

橫渠祠以倡正學後擢貴陽府經理蠻部方略輻輳以憂去起補兩浙鹽使奏最爲天下第一

雷元善字汝仁萬歷進士少貧牧羊年十八始事讀書知仁壽縣縣叢盜多豪幾不可治元善挫強剔蠹疾惡如讐不少假借一歲之間威積四著盜息民安吏皆伏不敢動

李用中字詢羲萬歷進士三仕爲令皆有名蹟而內江上蔡尤號難治用中砥礪廉隅調濟寬猛甚得物情

李朴字季白萬歷進士性忠鯁敢言觀政吏部聞母病請假不俟報而行擢戶部主事神宗春秋高不視朝前後上書極論皆不省朴每一疏出人爭傳誦及爲郎中疏奏滿朝傾動光宗在東宮每袖其疏及卽位進太僕少卿著有調刁集雪亭集數卷

王之寀字蓋甫萬歷進士剛毅有大節知無極縣請罷協鄰驛歲省三千餘金沿河兩岸鑿千餘井灌田又教植柳桑爲鄉約六十餘所里社九十餘學以宏教化

後陞刑部主事首發梃擊案屢陞刑部侍郎見明史

張綸音字作欽萬歷進士累官至湖廣按察副使在官懲姦蠹詭訟以威稜著而持己廉潔漢口賦無定數乃立限額不多取朝覲例資千金禁除之緝巨盜百餘人境內肅然

翟事心字鑑寰萬歷舉人言動以禮後知保昌縣撫教篤至士民甚愛慕建祠祀之著有抱甕集十卷

李聯芳字同春萬歷進士知洧川縣能擒巨盜調真定御史嚴明積猾見面皆五色無主自奉至廉食雜麥豆屑湯餅而已

李繼芳字蘭畹聯芳季弟萬歷舉人知三河縣地近京貴戚中涓率侵奪民田吏多黠黠徵輸增益民大困繼芳手爲盤算濫派毫忽悉除減糧幾三千金請著爲令天旱禱於神有龍蜿蜒見蜥蜴形自以石擊之應手霆震大雨霑足人呼爲時雨令

王于陞字文石萬歷進士授戶部主事權稅崇文門嚴御羣璫寬商旅溢額數千

金分毫不以入己超陞鄭中督餉薊州州人思其德祀入名宦歷官岢嵐兵備道流寇掠代城親率兵戰敗之獲其渠魁特陞布政使予告歸作漫園著有漫公集時稱達不玷名窮不慚節

成珍字鎮寰萬歷進士初家貧雅自持拾金還主活兩命及知鉅野縣愛民如子民不忍訟歲饑賑粥躬親調度邑無死亡調武強時呂公維祺以司理至縣民男女老幼數萬人求保留哭聲震野呂爲涕泗崇祀名宦及在武強遷官將還士庶涕泣爭送貧無以歸至剝所服帶後屢遷戶部郎中出知夔州府清直益著方嚴峭厲人皆敬而畏之卒日貧如洗至無以給喪流寇之亂賊以珍爲賢下令敢入成氏村一隊皆斬

趙勉萬歷舉人有孝行授新蔡令新蔡夙號疲敝力農者希勉躬詣阡陌指授錢鏹氏減家督民始樂業別姦蠹雪冤獄卻羨金人服其廉明焉

李楷字叔則號河濱聯芳子天啓舉人少聰敏好古文學築通帝樓高十丈許命書估日送圖籍手自評隲後知寶應縣以傲睨中讒謝去歸里值兩臺修陝西通

志延至會城縱飲揮毫每有一作當事者爭付梓名傾海內著有河濱全書一百卷

王祚字克纘天啓舉人知慶雲縣大兵入境祚誓衆曰我輩等死耳甯死城中勿死城外也相持十餘日圍得解

上官宏基字孕昌崇禎舉人歷教授陞營山知縣縣故號繁盛一切供給取辦里民帷帳日一易宏基悉斥罷政尙寬簡吏胥束手相繼辭去亦聽之不相制署曹肅然卒於官民如失父母爲建祠會祀蜀道險遠貧無以歸爭輸金助裝遞肩靈輻直踰棧道其遺愛在民如此

雷于霖字午天號柏林崇禎舉人幼貧性孝親沒幾不勝喪壯好古文學爲文奇挺研理聲譽翕集時流寇猖獗倡衆修泰安堡全活萬人至今賴之順治丙戌土人縱暴入城知縣宋大儒逃去于霖因以兵法部勒堡人擁官入城中響應遂滅賊然卒歸功大儒所著有孝經神授篇西銘續生篇太極圖說柏林集別世言王鉞字弢甫號松園崇禎舉人知吳橋縣有仁慈聲以不適時宜歸日以著書講

學爲事學者翕然宗之著有論孟正義錄性理三解松園集墨堂集

趙天秩字仲禮生而靈異性端方行不左右顧五經子史一過目輒不忘尤精易六七歲時誦讀雖暑夜父將農穫而燈猶未熄每奪其燈成童從苑洛先生遊甚奇之年二十爲諸生尋卒

劉愛字仁夫諸生博學能詩造門從學者屣履常滿人才多所成就隱居聖山寺十餘年歸老洛濱布衣草食時或弗給而陶然自樂年九十餘乃終

張恢綱字時憲舉人少爲諸生一意稽古肆力羣籍尤究心理數之學謂邵蔡諸子皆有偏駁於是窮搜互證著參兩數一書闡前聖未發之蘊正先儒襲舛之失人服其精深

郭肯穫字穉仲崇禎舉人純樸一若不辨權衡讀書無所不窺時推博雅明運旣終隱居不出雷于霖稱其對世也若木若納迨世道頻革人皆龍矯已獨鴻冥豈學古無獲者能之乎弟肯堂棄諸生偕隱逆闖入關中強徵肯穫欲用之肯穫亡去繫肯堂獄脅致其兄肯堂終不屈卒得兄弟全節時稱爲二難云

國朝

王報春字育萬順治乙酉舉人以教諭遷永年令有循聲告歸後祀名宦祠其宦蹟詳載永年志中子鵬翼六翻康熙辛酉舉人鵬程搏九己卯省元皆有名

郭嶷然字因之順治乙酉舉人以教諭遷知閩清清江昭化等縣卻金禦盜所在有聲又昭化有女子爲盜主交通半天下前令皆先往致敬乃得相安嶷然執不肯無何女子來謁偉岸傑黠不可御嶷然怒猝捕下獄募民有訟者旣盈案卽斃之獄其黨震散其餘殘民寥寥御之如家人教以耕織爲製其器解官後囊無一物焉

劉璽字爾符號三峰順治丁亥進士知烏程縣剔釐姦弊讐服豪強漕糧立倒厥法他縣多倣之擒治大湖巨盜親搏戰水上獲渠魁白花蛇沈三卽斃之獄羣盜震懼不敢止五百里內廉幹名傾兩浙長興歸安同時缺令民爭求璽鬪於府治歸安民奪肩輿去乃定古文辭置之歐曾集中巧眼不能辨也著有鑱山集

張好奇字知天綸音子順治壬辰進士初知鞏縣歷陞提學僉事鞏黃灘水口因

民暫耕遂起額稅然時輒沒入河稅不得脫好奇請三年一丈以地有無爲存豁
鞏民德之尤慎刑獄全活甚多以爲動關人命死生立簿自記功過元日告天焚
之

王建常字仲復號復齋之案從子父之寵鎮撫散官少爲諸生後棄去銳意聖學
於六經子史濂洛關閩之書無不詳究年近八十家貧常不舉火而泰然自得造
次必於禮教授生徒足不入城市華陰王宏撰稱爲泰山巖巖晚年造詣純粹有
光風霽月之度戶曹張柟通籍後始拜其門自言不遇先生幾枉一生吳縣顧炎
武博雅冠天下數以疑義相質學使許孫荃造廬持金幣爲壽辭不受贈以詩不
答題其門曰真隱其學以主敬存誠爲功窮理守道爲務生平尤致力於小學前
輩以爲關學自橫渠後的派真傳當推建常爲第一著有小學句讀記大學直解
書經要義春秋要義太極圖集解律呂圖說復齋錄四禮慎行錄兩論輯說詩經
會編忠誠錄復齋別錄復齋日記餘稿諸書皆手書細字端楷一筆不苟云
張柟字讓伯順治乙未進士少不羈質直剛果毅然要做天下第一流人事知巴

縣力變舊政陞戶部主事猶清貧不能自給著有質言二卷皆言政事設施及聖賢修身省心之要

張召南字文仲順治辛丑進士知安福縣西鄉連山阻遠民刁抗不供賦召南單騎往諭以大義民咸感泣輸賦爲各郡最康熙甲寅耿逆叛召南赴省請兵未至城屢陷歸馳至境內招集鄉勇令健僕率以攻賊遙爲聲援於外賊乃踰山而遁遂復安福入城招撫僞官五十七員難民萬餘人令耆老勸諭開懇荒田凡二千頃陞中書舍人

王在亶字信之皞如季子少孤事母至孝尤好義負欠者數十家悉焚其券

郭治字完我康熙辛卯舉人任雲南寶甯知縣多惠政善察人私隱民不敢爲姦性豪邁遇事敢爲羣頌其德

王人瑄字璧六康熙辛卯副貢任高臺縣教諭方嚴有守其啓迪多士必以器識爲先而才藝爲後其造就者皆成名儒

徐渤字學海號又拙康熙甲午舉人山東栖霞縣知縣先有邪教株連逮繫累累

渤蒞任爲別其首從定罪力請於上官得末減者甚衆至開徵令民自封投櫃杜漁侵革耗羨絲毫無所染民爲建清廉碑以頌德

張麟字景山號覺菴歲貢生峭直磊落恥爲柔佞之行家法整肅家人未敢有犯者教二子發祖懷祖成名喜排難解紛濟困扶危鄉人受其庇者戴德不衰

張發祖字孝舒號西濱康熙辛丑進士官禮部主事自少嗜學勵志聖賢言動必循禮法無所苟且爲人一主於敬平生無所著述惟以身體力行爲主嘗曰得尺行尺得寸行寸乃爲實學儀容斂抑退然若不勝衣而剛毅有守有確乎不拔之節居官九載清操卓立艱苦之狀寒士有所不堪林下三十年閉門課讀不爲衣食計家屢困館穀常以給親舊之貧者身雖浣衣濯冠晏如也其內重外輕類如此

劉峒字星柱號筠石璽長子康熙戊午舉人嗜學忘寢食歲饑累日不火食猶讀書不輟至困仆啖糜藜糠覈餅得不死時當事諱災峒力請報聞簡牘頻煩切至及朝命大臣勘賑又呈災狀除鄜州教授不就著有大中正義等書數十卷弟涵

己卯舉人亦有名

關中俊字遜伯慕馮恭定之學事二親以孝聞居喪以禮不爲浮屠事著有巢居野人集鶴陰鳴和集

王辰字公黼號梅齋少穎慧父商於南沒水濱徒跣千里求屍不得號泣歸途抱恨終天遂絕意仕進雷柏林李河濱皆重之

張五經字翊書歲貢生經明行修淡於仕進閉戶窮經口不絕吟手不停披士林宗之膺鄉飲五次著有太易彙解

上官汝恢字端伯號果齋歲貢生有孝行以義服人里無爭訟常推田畝以窶貧不能葬者善教誨成人材進士趙蒲受業其門其子德輿雍正壬子冠於鄉雍正五年保舉賢良方正辭不就邑令楊臚賜顏其門曰理學名儒

麻居湄字交叔雍正癸卯進士授陽武署鄭州兼攝上北河同知歷任勤勞寬催科慎刑獄修文廟城池設義學捐賑饑民數千人又捐給牛種凡墾報數百頃以病歸居家孝友壬子歲歉出金散給鄉鄰貧乏者

安養哲字旣明號保亭雍正癸卯舉人性孝友英敏嗜古文學任廣西隆安縣令地素瘠薄俗甚狡險哲至革陋規懲姦剔弊禮士勸農人咸德之開渠引江水灌稻田數百頃隆民稱永利焉上憲嘉其能屢委訊結鄰邑巨案嚴拒賄賂粵西學使羅公以道義文章爲忘形交謂學問純粹操守清潔書翰有晉人風

上官有儀字公度雍正丁未進士才識明敏有守有爲任山東齊河縣知縣理滯獄端士風嚴行保甲姦宄無所容御民一以誠信縣大治擢戶部主事綜覈詳愼最有能聲

趙淵字子靜號龍溪乾隆丙辰舉人任江西瀘溪縣令甫下車適逢歲歉因偏災格於例不得上請即出己資二千金稍紓民困每屆春則攜羊酒出郊以勞農人且繪勸農圖旣調南城瀘人挽留不得遮道焚香者不絕及治南緩催科絕苞苴慈惠清廉口碑載道卒於官白衣冠而送者數千人

趙蒲字廷璧號毅齋乾隆丁巳進士知四川儀隴縣令重修文廟日與士子講學文教振興爲治一以薛文清公從政名言爲法循

劉昱字汝正號覺軒璽曾孫雍正己酉經魁登乾隆丁巳明通榜授府谷縣教諭訓課有方文風丕變紳民感戴告歸後多年猶有不遠數千里而來訊者平生博極羣書自經史子集以及易象卜筮無所不通尤精岐黃家言爲文章喜純正在籍十餘載卒未嘗一入城市廉靜端方不愧清白家風云

張愉字子言歲貢生品高行卓學問淹雅與羣季子弟輩友愛篤至殷勤率導不遺餘力嘉惠後學惟恐弗及自奉儉樸心存惠愛能任人託孤捐粟賑荒輸金助役不一而足邑令先後至者皆高其詣

王廷輔字公左號雲溪歲貢生任甘肅古浪縣訓導諭諸生曰學者德行爲本文藝爲末倘名節有虧即學富才充亦不見其不朽以故士子皆知恥自好守法奉公捐俸募金創立書院又以其膏火束脩入正項交代俾勿壞自是古浪人士敦師講學者多矣事繼母至孝待異母弟甚厚性廉靜一介不苟著四書集註釋疑精書法善畫山水是文與行固兼而有之

徐朝錦字萬龍歲貢生官甘肅靖遠縣訓導訓士嚴立條規仿胡安定經義治事

之法日與士子講貫嘗葬母族趙氏之無後者七世十一塚人稱其義平生陶情詩酒不以得失繫懷雖日不舉火處之泰然

楊卿雲字瑞廷乾隆丁酉舉人由大挑任蒼溪知縣地僻多重案卿雲悉爲平反調清溪縣毗連番境地瘠民寡值西域不靖兵差浩繁卿雲立章程修廢舉墜報滿署南充縣時教匪起卿雲辦軍務以積勞卒於官衣不盈篋斂服綫多綻裂事聞贈同知 賜葬祭子蔭縣丞

雷爾杰字漢三號毅齋乾隆庚辰鄉榜第一分發雲南署大姚縣在任如寒時視民如家事勸農課士息盜安民燭姦若炬嫉惡如仇有神明之稱終以亢直不合罷

劉繩武字繼先號洛濱乾隆己亥舉人少聰慧於經史子集無所不窺方嚴古樸廉於取與無子臨終捐其田宅爲先祠祭田立義塾又捐數千金取息爲邑鄉會者資斧及書院膏火著有四書挾要春秋隨見錄正蒙管見

楊彥魁字子俊諸生純孝嘗對案食貪觀書誤以箸濡硯墨汁淋淋滿口旁不自

知也端謹質直不飲酒不觀優輯四書諸家講義參酌折中顏曰釋疑

席友蘭字綺石乾隆壬子舉人歷任湖北羅田棗陽知縣所至有聲後以事解任金陵總督孫寄圃聞其名聘主講寶晉書院成就頗衆平生工書武昌黃鶴樓名人手蹟不一友蘭書一聯豐采秀逸論者謂其冠絕古今一時名公碑版勝地聯額多出其手偶爾裁答片紙尺幅皆足珍重焉

李元春字仲仁號時齋又號桐閣嘉慶戊午舉人大理寺評事性穎悟精力過人少貧不能學一日過里塾聞誦書聲喜告母始就學年十二三塾師講仁而不佞章苦思前後諸章言仁不同及註語乃悟聖學求仁之要惟當理而無私心非全體不息不足以當之二語爲盡遂立志聖賢徧求程朱書及父沒母老絕意仕進主講潼川華原各書院教人以身心性命之學誠正爲本而要於有恆講學必宗程朱著述甚富詳經籍志皆扶世教正學術而不爲空言咸豐六年巡撫吳振械奏請入祀鄉賢祠光緒元年學使吳大澂奏請宣付 國史館列入儒林傳

張佑字乾伯嘉慶壬戌進士少聰明過目不忘於書無所不讀善古文詞性過峻

知福山縣僅五月卽引疾歸嘗主講關中書院著有都是春齋

霍樹清字松軒嘉慶壬戌進士砥學勵行矢志不渝由翰林出宰歷劇縣以卓異陞南昌同知三署贛州在甘肅鎮原革鬻地逾年復價之弊改甲首附里長賠累之苦賑平羅紅水災躬自散給計口予錢民被實惠吏杜侵漁假歸里置祭田設義學爲受業師買田卹其後贛州會匪久爲民害拿獲四百餘人民賴以安訟多堂結不經刑名師卒祀南昌名宦祠

柴毓勳字思堂嘉慶戊辰舉人讀書攻苦常衣不解帶名譟一時仕固原州學正教士皆急敦品不責其贄肄業者益衆興鄉飲修泮池捐俸增 聖廟燈及香燭之供前後州守道憲及提督軍門俱禮敬之上憲保舉知縣不受遂陞教授爲官十餘年未嘗挾家焉

劉重麟字仁趾初仕永安州後累遷都察院右副都御史前署臨桂縣代償虧庫項幾二萬補嚴州賑荒行分平糶法大府下其制爲各郡式在臺灣兼學政地多寶玉士子以賄爲常重斥之關白者風遂息在江西按察使值大荒有漕糧八十

艘建議借漕米以蘇民困奏下之日再爲挪繳大府然之民賴以全活爲都御史
彌補庫款請減外任大員養廉一半又奏常平倉多虛設請核實買補積儲平生
俊偉光明毫無世俗醜態

馬大韶字虞操諸生少嗜學家貧授徒砥礪道學學日益進志日益堅極喜薛文
清王復齋仍以朱子爲主生平敦實誼惡浮囂講古禮反時俗居喪三年不入內
不葷飲葬祭一遵家禮著朱子周易本義旁贊說詩貽笑春秋繪像孝經述宗
李士式字子法嘉慶丙子舉人授廣靈知縣始至案牘堆積蠹屋梁未逾月積牘
頓清會大水傷禾捐俸賑之老病不能就食者遣役送諸其室渾源州兄弟五人
爭財致訟久不決飭士式往勘士式作五子爭財歌有黃泉見爹娘爹娘羞不語
之句五人感泣訟遂息告歸載圖書數篋別無長物

席光縉字雲占嘉慶己卯進士授直隸欒城縣地當孔道差徭繁重斟酌裁汰民
力用舒每歲秋獮清塵之車以千計稟請減之善折獄牒甫投即訊之署萬泉有
富豪某田數百頃決河灌溉以數千金求立石光縉卻之仍相其地勢令四圍均

開渠灌溉詳府立案補吳橋修夷齊廟赤蜂橋卒之日士民巷哭祀名宦祠

劉元孺字慕堂道光癸未進士歷官刑部郎中事繼母閭嘗跪解其怒刑部有姦斃幼女一案獄已具元孺察其情自鞠獲兇首一訊即服因派總辦秋審京察以知府用

雷五福字疇九道光癸巳進士知武邑縣創觀津書院捐俸數千金爲膏火資調交河以運河不時決傷民田捐俸築隄防之民賴以安

奚應龍字雲樵道光甲午武榜眼授閩浙參將有名花會賊依山濱海出沒不測應龍遣健夫五六十人爲內應以兵繼之擒其渠魁補慶遠副將楚匪竄入粵應龍率兵進剿至貴州開泰縣遇賊數萬兵僅九百餘人應龍獲賊諜釋之使以兵少告卽檄催未至兵疾趨赴援賊有幻術應龍令兵以巾裹米臨陣颺之賊目迷遂大破之旋擒粵匪李志信斬之升左江鎮總兵捐俸給餉破賊袁晚黃五善等二萬衆斃首匪九名諭降張國梁後成名將授廣西提督疊破潯匪李文茂等先後斬首八千盡殲其餘黨柳州慶遠以次平咸豐辛亥賊復熾盤據諸險且廣設

礮臺應龍以所得賊之旗幟挺身先導直入其營賊不能辨遂斬其渠魁餘悉走
去後卒於柳州軍營 諭賜葬祭有加長子蔭道銜應龍忠孝智勇本於天性出
仕迎養其父定省無缺父沒值伏臘哀痛不食尤好讀書經史兵法戚少保紀效
新書練兵寶紀皆能成誦臨陣神色不變故所向有功

李懷庚字西垣道光乙未進士性純篤歷署兩當各縣皆有政聲補靖遠立文社
設有嬰堂修城垣築河隄輯邑乘百廢俱興陝撫李文忠公耳其名邀襄辦荒政
升河州知州州故回漢雜處懷庚恩威並用衆皆畏服後以勞累遷鞏秦階道以
功加按察使銜

薛珊字鐵海性剛明歷任太原各府同知咸豐壬子調趙城粵匪入晉至洪洞珊
聞警卽募勇修城繕器械防禦且曰賊乘勝深入利速戰且彼意在太原吾能拒
數日則韓侯嶺以北防禦可備縱失守晉省可全其半不猶愈乎賊至珊率衆以
礮擊之鼓行而西賊疑援軍大至遂驚遁恆中丞以守趙聞加知府銜署蒲州府
濬修姚運渠石塘灌田十數村民甚賴之

閻敬銘字丹初號約齋道光乙巳進士由翰林累官戶部尙書東閣大學士性廉介不諧俗尙孝友親睦雖昆弟分爨已久後將之京盡以家財讓諸姪教子姓以正學卽戶族漸遠必自出脩脯延師以嚴督其功課嘗置義田贍族人凡男女老疾之稍貧者皆按年給費不使或絀遇年荒必自籌數千金以賑恤之不使一人食官糧嘗囑諸子謂沒後喪祭必以禮毋得以音樂酒肉治葬事不用浮屠不收賻儀卒如其言此外凡邑中有關民瘼籲懇憲恩之處亦無不曲爲裁成焉其歷任之政績詳 國史卒諡文介

霍爲棻字苑史樹清子道光丁未進士署綿竹髮匪藍大順羣賊麇集守禦數十日要賊於路大敗之士寇方問子據山聚衆爲賊應爲棻勦擒百餘人盜越嶺竄又教匪黃某聚衆結寨爲棻單騎入寨諭散其衆駱文忠公督蜀聞其名令署成都公私旁午凡事皆身任之循聲大著調華陽減差徭錢著爲例署巴縣清釐訟牘署合州獲巨盜十名升邛州加知府銜灌縣賊起率勇督防民得安集卒於任入祀邛州名宦祠

董文煜字質生廷爵孫道光乙未舉人有至性授湖北當陽縣有兄弟爭產者其兄以三百金求直文煜置金案上諭以骨肉之誼兄弟感泣而去當陽地丁銀皆納以錢吏胥因緣爲姦文煜定章刊示宿弊以清調鍾祥粵匪突至分股由東北門來城陷文煜走鄉募勇得一千二百人並飭邑紳夏榮春等各帶數百勇急圖克復連攻五晝夜焚東北二門督勇扒城首刃黃旗賊目一名賊遂潰生擒僞元帥僞三王等正法時湖北全省盡爲粵匪蹂躪無何賊又大至文煜曰事不可爲矣遂自縊巡撫胡文忠公林翼入奏贈知府銜 賜葬祭銀子壙蔭州判

王會昌字熾侯咸豐壬子舉人性純篤從李時齋學以造道器許之師沒絕酒肉不與宴如守親喪送葬纒絰執紼哭甚哀事親孝父沒時值回匪亂會昌日夜守墓哭泣不輟生平以道德文章爲事著有祛疴齋文集

楊樹椿字仁甫號損齋諸生有志洛閩講求真切絕意進取於名利泊如也事母至孝處兄弟待朋友懇惻直諒其爲學堅實刻苦默契精思養深而純守嚴而固晚年學益邃邑宰黃照臨特設友仁書院延聘講學學使吳大澂以學行疏於

朝略曰朝邑楊樹椿隱居華山潛心理學不入官府有古君子風臣案臨同州知其所讀性理諸書融會貫通實有心得平日涵養之功一本程朱主敬之學所謂篤行謹守不求聞達亦足爲士林則矣奏奉 諭旨加國子監學正銜

王庭杞字晉臣幼倜儻有大志以世亂講求武備同治壬戌回亂土匪乘閒起庭杞糾鄉勇立斬渠魁七人至澄城長甯河擒斬回匪九人癸亥赴甯夏率難民精壯者禦回匪於大瓦溝躍馬大呼曠目而前連刺二人斬十餘級賊披靡奔潰甲子庭杞遠居蒙古值將軍穆圖善師至聞其名檄辦軍糧庭杞以餉不足自辭薪水以激勵士卒且多方勸措軍食無缺叙勞得千總銜丁卯大軍破中灘賊巢賞戴藍翎戊辰從將軍金順破王家疇保守備己巳古城清肅賞花翎仍檄襄辦都統烏拉沁糧臺庚午甯夏平請假歸里嗣聞賊復變急赴軍營至則沁已戰沒遂憂憤以卒

權執中字允之諸生回匪亂各鄉練團執中團兩宜鎮統衆禦之爲一邑稱最多忠勇公至邀執中運糧鄜洛宜川兼爲鄉導後以母老辭歸築兩宜鎮寨居民賴

之保教諭五品銜以知縣用

附孝弟二十八人

明

照 磨 忽 棋 廬墓三年盜不忍害

大學生 王朝璽 事親養志廬墓三年

光祿署丞 王于豐 天性孝友廬墓三年

生 員 李 仁 廬墓涓溢負士築護

柴英才 曲意盡孝鄉鄰豎碑

趙天好 承顏順意廬墓三年

生 員 雷 捷 遠涉控讐父弟尸還

生 員 劉世澤 孤幼申冤建廟祀父

略陽教諭 嚴思慎 愛弟情殷盡讓父產

長山訓導 忽以恆 情篤友弟不留己業

解國泰 七世同居孝友雍睦

國朝

生 員 雷王賓 不茹菜果三年哭奠

生 員 張奠極 不御酒肉廬墓三年

宋 斗 孝友性成人言無間

劉朝善 廬墓雙親每食必祭

生 員 張疇武 哀毀骨立三年廬墓

貢 生 王元灝 孝名夙著廬墓三年

陳效固 親疾嘗糞祝神延年

党夢鼈 廬墓三載未嘗歸家

薛國光 善事繼母病祈身代

石振聲 衛兄捍亂事同嚴父

恩 貢 聶椿樹 學品無忝怒怨不藏

朱作新 事親至孝樂道終身

附義行三十人

明

生 員 雷 珍 嗣姑復子留產歸宗

王文美 賑粟數百克昌科名

光祿署丞 王子豐 繼父義行名著三秦

蘇濟舟 市田設漿歲荒掩殮

朱志仁 拾金不昧慨還本主

劉宏禹 事親極歡廬墓必祭

白士琳 善事繼母刑于寡妻

蒙生芳 廬墓十年造次弗離

楊鳳詔 守兄道範敬如父師

党宰潮 有光庭訓兼遂岐黃

雷 冬 輸粟賑荒不吝私財

元遵先 負性尚義慨施賑粟

上林監丞 王子鎬 見義必為與兄同美

蘇繼祖 歲歉賑麥施席餓孀

國朝

薛務本 八世同居勤儉治家

王應佩 同十一世食指八百

魯爾良 同居十世門內肅雍

張文英 無善不為義著鄉里

閻文暉 矜孤恤貧全活無算

張鵬 慷慨樂施傾囊賑濟

張珣 義感同室捐廩助賑

候銓道 劉大受 素擅周恤馳名善人

謝正原 兄弟好義鉅萬弗惜

李天彪 錢餅賑饑施棺遷骨

生 員 雷晟 留心行義弗吝萬金

副 貢 王維戊 九世同居人稱義門

劉青照堂 搜行衆善百萬不惜

劉化凝 置田設塾數賑多粟

州 同蒙天庥 衆善廣行積書萬卷

武鵬程 調貧賑饑活人甚衆

張鏡 累世好義賑饑無算

生 員 張星浩 賑粟千石衆善必為

高希冉 兄弟樂施善難悉述

朱宗顯 施麥賑荒毫無吝色

朱作賓 賑麥散錢焚簿辭匾

附名宦祠

明

知縣王喬棟 魏傑 李英 蘇槃 縣丞卞禮

國朝

工部侍郎陝西督學道諡忠節葉映榴 知縣羅人琮

附鄉賢祠

唐

右散騎常侍嚴善思

明

監察御史高翔 翰林院編修程濟

山西布政司左參議喬誠 直隸大名府通判程範

蘇州府同知王喬 福建按察司副使韓紹宗

兗州府知府劉偉 山西按察司僉事王朝雍

太子少保兵部尚書諡恭簡韓邦奇 山西布政司左參議韓邦靖

浙江道監察御史忠孝雷士楨 監 察 御 史 嚴天祥

山東 按 察 使王嗣美 刑 部 侍 郎王之竊

應 州 知 州王惟精 戶 部 員 外 郎李聯芳

大理 寺 少 卿李 朴 湖 廣 按 察 司 副 使張綸音

河南布政司參 議李用中 直 隸 武 清 縣 知 縣韓 倫

舉 人雷于霖

國朝

保 應 縣 知 縣李 楷 翰 林 院 編 修張孚貞

河 南 督 學 道張好奇 處 士王建常

誥封通政大夫四川布政使司布政使候銓道 劉大受

大理 寺 評 事 舉 人李元春

附貞孝節烈五十三人

元

馬宅妻王氏 守節終貞延祐旌表

明

劉烈女 甫字夫死易服自經

李烈女 母弗能依飲酖以死

張烈女 已字夫死給母自經

吳烈女 流寇劫掠大罵被害

劉烈女 恥字伶工服毒而死

張三妻師氏 夫死守節終身如一

王亨妻靳氏 事親撫孤誓不再適

楊專妻張氏 歲祲夫死整衣投河

羅詢妻党氏 盜殺夫子號哭申冤

任世威妻閻氏 舅姑奪嫁用刀自刎

王思謙妻楊氏 撫孤食辛奪嫁自經

何大慶妻翟氏 夫亡自縊誓不獨存

韓登第妻高氏 舅姑逼嫁棄子投井

石捷妻張氏 夫死拜姑閉戶自縊

國朝

劉烈女 聞夫為優不食縊死

成烈女 夫死奔喪改妝事姑

王烈女 夫死姑瞽奔歸矢志

雷三喜妻李氏 過門未婚夫死事姑

井七兒妻趙氏 夫出無音娶守空閨

李大策妻曹氏 甫登夫出終身守節

郭福學妻穆氏 夫出不歸擇日迎婚

李長陞妻路氏 夫死始婚事親無怨

申祖志妻劉氏 夫疾婚娶送死守貞

嚴述堯妻張氏 夫死聞訃新衣自經

高汝槐妻李氏 請期夫死嘔血以終

趙逢西妻孟氏 甫婚夫死乘閒自縊

馮仰妻田氏 侍夫風疾死亦自刎

仇玉慶妻王氏 請期夫死七日而縊

孫崇樸妻薛氏 逼嫁脫歸飲藥以死

王文祥妻張氏 拒污斷臂雪冤即死

張璠妻樊氏 夫亡痛哭嘔血以死

張頌音妻蘇氏 夫死子立解衣市棺

何之英妻張氏 夫亡撫子截髮附棺

麻淳然妻井氏 事姑教子大節凜然

溫如昆妻劉氏 夫患病死扃戶投繯

馬士順妻党氏 夫死懸梁留姪縊麻

楊永秀妻古氏 夫死哀痛展轉氣絕

安治國妻張氏 夫死三年奪嫁自縊

秦根管妻趙氏 力抵無賴賊懼扼死

楊寅聲妻陳氏 正色拒污閉戶自經

薛生文妻楊氏 拒污申冤投井而死

李含兒妻高氏 逼孀再醮投井全節

田逢年妻麻氏 夫死兒冠從容自縊

張鸞鳴妻党氏 舅姑皆沒鍵戶自經

張不煥妻胥氏 親沒事畢入閨自縊

張兆蓮妻純氏 事姑茹辛焚香自經

韓五鳳妻楊氏 服毒殉夫志節不移

霍勤炳妻王氏 夫死不食三日即逝

朱德馨妻楊氏 事親撫弟姜班貞範

朱續馨妻雷氏 捐軀殉難玉潔冰清

張萬慶妻雪氏 嫁三日寡白首冰霜

石烈女 罵賊被害姊妹雙烈

人類

皆漢人無別種族

戶口

道咸時鄉里庶富戶口浩繁自同治壬戌回匪變起捻逆繼至以及光緒丁丑戊

寅大荒賊傷餓斃者減十之四現在烟戶貳萬壹千柒百柒拾叁戶 男肆萬伍千捌

百貳拾壹丁女肆萬玖千壹百伍拾壹口共男女玖萬肆千玖百柒拾貳丁口

氏族

秦安堡雷姓系出帝妃方雷氏因以雷為姓由馮翊遷居縣境至今傳十九代

趙渡鎮閻姓系出晉閻嘉之後元末由晉遷居縣境至今傳二十一代

韋林鎮霍姓系出武王弟霍叔之後因以國為氏元末由晉遷居縣境至今傳二

十一代

五里舖雷姓系出前漢郎中雷被之後見淮南衡山王傳宋時由耀州遷居縣境至今傳二十二代

龍門村劉姓系出陶唐氏劉累之後在晉爲劉氏元末由馮翊遷居縣境至今傳二十二代

西野鵲村楊姓系出春秋時晉武公支子姬伯橋五世孫羊舌肸叔向食采楊氏其子伯石以邑爲氏故號楊肸楊石後黨祁盈滅族肸子孫逃於華山仙谷遂蕃衍於華陰爲關中著姓元順帝時江南安撫楊燧遷居縣境用楊寶放鵲故事名村曰野鵲其孫楊恭明陝西布政使至今傳十九代

北平羅村朱姓系出顓頊後裔封邾國楚滅之去邑留朱子孫因氏焉屬沛國郡元末由晉遷居縣境至今傳二十一代

貝家莊馬姓系出伯益賜姓嬴氏周孝王時造父封趙爲趙氏戰國趙奢封馬服君遂爲馬氏元末由洪洞遷縣之許村明中葉始遷居貝家莊至今傳十四代

迪村張姓系出軒轅第五子揮始造弦張網羅世掌其職由晉遷居縣境至今傳二十二代

城內趙姓系出周造父爲穆王御八駿馬後以有功封於趙因氏焉元至正間由晉遷居縣境至今傳二十一代

南留社李姓系出李伯陽之後見風俗通元末由晉遷居縣境至今傳二十一代
西平羅村翟姓系出墨子名翟因氏焉宋徽宗時由山西稷山縣遷居縣境至今傳二十二代

倉頭村閻姓系出周後裔姬嬖封於閻鄉因氏焉由晉遷居縣境至今傳二十二代

宗教

士民悉遵孔教信耶蘇教者盡住河東郝家莊王家莊等處教民共二十餘口

實業

自庚子辛丑凶荒連年民氣未蘇多耕畎畝少事詩書現在清查

業士者柒百有奇

業農者肆萬壹千玖百有奇

業工者陸百有奇

業商者貳千伍百有奇

地理

縣境北枕廉山南臨渭汭右環洛水左繞黃河而河則東北自龍門陡下洪濤急浪直奔西南趨縣境跨巽隅始蜿蜒而轉東洛則自西北來又迤邐東南貫注域中而達於河朝坂從東北西南隆起盤結於廉洛二界沙苑尤蒼蔚顯伏於渭洛兩間洵稱邑里之勝概乃吾全秦之咽喉而咫尺接壤者則潼關直作口吻華嶽正當屏藩焉此固朝邑地理之大形勢也

縣境南北九十里東西五十里

縣城在 京城西南二千一百里 在長安省城東北二百七十里 在同州府

城東三十里 在潼關西北六十里

縣城東至黃河五里 河道時變此據現在 又東至舊大慶關二十三里接山西蒲州界至蒲州府城共三十里

西至高城二十里接大荔界至同州府城共三十里

南至洛水十里又南至渭水三十里接華陰界至華陰縣城共六十里

北至金水五十里接郃陽界至郃陽縣城共一百里

東南至望仙觀南三十里接華陰界

東北至洿谷五十五里接郃陽界

西南至沙苑十里又西南至仁義村三十五里接大荔界

西北至西平羅西莊村四十五里接澄城界至澄城縣城共百里 城內有文

廟 城隍廟 雙忠祠明高翔程濟 三烈祠明劉李張三烈女後凡節孝附之 王公祠

本朝邑令王兆鼈 吳起二石獅 考院 初等小學堂二

境內分十四巡警局

中局在治城內轄四街兩關二十一村 東黃河西伯士局南饒益局北安仁局

內有 春秋王城 漢沙橋今爲寺 後周長春宮 三皇廟 唐金龍寺 嚴
 譔祠墓 宋敕建東嶽行祠即崇佑觀 元王由義墓 明程濟故里 韓恭簡
 公墓 泰安堡 雷于霖墓 五先生祠明高翔程濟韓邦奇本朝王建常李元春 本
 朝閻文介公墓 文介公專祠 新大慶關稅課局 釐局 南寨豐圖義倉
 高等小學堂一 初等小學堂一
 舊大慶關局在治城東二十八里轄三街五村 東蒲州界西黃河南黃河北黃
 河 內有 春秋蒲關 戰國臨晉關 漢唐蒲津關 韓信陳兵處 秦浮橋
 以上今皆無存 唐鐵牛浮橋西牛被河衝東尙存 宋大慶關 漢河瀆祠今廢 大
 禹廟 太公廟 水利廳 初等小學堂三
 伯士鎮局在城西十五里轄一鎮二十八村 東中局西大荔界南韋林局北安
 仁局 內有 戰國吳起廟 漢高陽城 唐乾坑 明周彧墓 初等小學堂
 一
 新市鎮饒益局在城南微東十里轄一鎮九村 東黃河西伯士局南安良局北

中局 內有 漢高祖廟 南梁及唐饒益寺 明韓邦靖墓 初等小學堂一

兩女鎮兩宜局在城北四十里轄一鎮十九村 東烏牛局西雙泉局南安仁局

北大定局 內有 兩女廟 保真觀 明王學謨墓 初等小學堂一

趙渡鎮安良局在城東南十五里轄一鎮三街 東黃河西永清局南洛水北饒

益局 內有 城隍廟 洛水渡舊每年冬作橋梁今廢 閻文介公故里

望仙觀永清局在城南微東二十五里轄十二村 東黃河西韋林局南華陰界

北饒益局 內有 春秋河曲今河侵沒 漢望仙觀 漢武帝廟 隋永豐倉

宋敕建城隍廟 淨安寺宋崇寧鐘 明王三省墓 王之竊墓 本朝王建常

墓 金龍渡 初等小學堂一

營田莊烏牛局在城東北四十里轄二十二村 東黃河西兩宜局南中局北大

定局 內有 春秋老人結草抗杜回處 唐劉幽求塚

白池村大定局在城東北五十里轄十五村 東黃河西飲至局南兩宜局北郃

陽界 內有 春秋刳首 元戈平章于社寨

韋林鎮局在城西南三十五里轄一鎮十八村 東永清局西大荔界南華陰界

北伯士局 內有 太白池 麻子池 蓮花池今為風沙沒 北周沙苑城 隋

唐馬監 宋牧龍坊以上皆廢 安靖寺 本朝李楷墓 李元春墓 初等小學

堂十二

安仁鎮局在城西北二十里轄一鎮四十八村 東烏牛局西大荔界南伯士局

北雙泉局 內有 春秋輔氏城 唐小鹽池後廢 通靈陂 白馬將軍扈鏢

塚 元嶮嶮子山石刻 明劉偉墓 王學古墓 本朝劉璽墓 初等小學堂

三

太夫村永定局在城西北三十里轄三村 東兩宜局西安仁局南安仁局北兩

宜局 內有 唐雷萬春故里

雙泉鎮局在城西北四十里轄一鎮十八村 東兩宜局西大荔界南安仁局北

飲至局 內有 五泉北魏以此名縣 隋豐羊牧以雙泉飲羊肥而不羶唐廢然局南北十

里東西數十里土皆斥鹵水不能飲十種九空農頗苦之 明高翔故里 陝西布政楊恭墓

楊樹椿墓

王彥莊飲至局在城西北五十里轄十一村 東大定局西澄城界南雙泉局北

澄城界 內

境內編三十三里

大約以地丁銀百兩為甲十甲為里光緒十六年清丈地畝後共編三十三里

曰 城關 豐潤 沙底 南陽 迪村 韋林 倉西 大慶 太夫 趙渡

隄濟 步昌 干村 上辛 雷村 寺子 龍泉 白池 高明 兩宜 平

羅 湘底 安仁 龍門 顧賢 官莊 西莊 太平 高陽 伯士 新開

新進 永新

山

鐵廉山 一曰長虹嶺曰許原曰商原曰商顏見漢書溝洫志在本縣治城之北五
十里當飲至雙泉大定兩宜四局所轄地其山橫互大荔朝邑兩縣西盡荔境絕
於洛東入本境五十里絕於黃河其折而西南者經烏牛安仁與中三局過縣城

西轉正南六十里曰朝坂曰彊梁原曰華原山以朝日光射層崖疊岸煙景萬狀
又折而西經伯士局二十里曰紫陽山亦以形如華原且當洛北然統一朝坂也
西魏之名朝邑縣者實取諸此乃朝夕之義非朝廷之謂北距廉麓四十餘里南
距洛十里東瀕河登高俯仰一攬無餘襟太華腋中條帶洛渭嶽色河聲畢湊几
席斯固秦漢之所以置臨晉而後周隋唐之建離宮特以河山毓秀四時不枯名
曰長春且沙苑突現於洛陰據伯士韋林二局縱十餘里橫二十餘里西跨大荔
渭南二縣境五十餘里中之沙阜似崗巒周圍井園繡結蔥翠滋潤又若沛澤斯
亦中土所罕觀而西北雙泉局廉谷之蔡莊湘底雙泉西莊五泉舊有太奇泉今枯然
泉仍足五與西南韋林局沙苑之麻子蓮花太白三池遙相掩映然惜皆夏潦冬涸
略供炊爨難資灌溉沙直不能耕苑亦夏畦之病洛渭無利於農而河且爲人患
是以地瘠民困而未如之何也已

水

黃河發源崑崙曲折東流至甘肅北出塞經河套而入長城南流爲秦晉兩省天

然分界初抵榆林府府谷縣東三十步入省境黃甫川自東北來注又南經神木縣東百二十里又南經葭州東一里葭蘆川自西來注又經綏德州吳堡縣東一里又經綏德州東百二十里又經清澗縣東百二十里無定河自北來注又經延安府延川縣東七十里又經宜川縣東百里又南至龍門山北入府境錯開河鬱水南谷水皆自西來注南經韓城縣東十五里濊水合離洳澗灤潦滄芝七水自西北來注又西南經郃陽縣東三十餘里百良水橋頭水漢水皆抵西北來注又河中有飛浮山出沒不時又西南自縣東北隅五十五里大定局所轄之洿谷村東十里始入縣境西南流十里至烏牛局所轄之北延壽村東金水自西北來注仍西南經烏牛局東五里流五十里經縣城東五里經饒益安良二局東最逼近舊大慶關局西十三里流十五里至趙渡鎮南洛水自西南來注更南流經永清局東至望仙觀南轉西十五里渭水自西徼北來注又南五里接華陰縣界若河之東則自龍門下經山西河津榮河臨晉三縣之西永濟縣之西南由此乃折而轉東流經潼關城北潼水自南穿城來注遂直東出本省入河南山西兩省境界

河本可行大船但自龍門甫下數百里怒濤激浪忽刷淺水之沙而驟深忽淤深水之泥而猛淺每遭覆舟滯船之害惟吾縣境內更可慨者數十年來水勢汎濫西侵沒民莊田日甚一日不可勝紀矣

渭水發源甘肅蘭州府渭源縣西烏鼠山溯自秦州西來東至鳳翔府隴州西南百里入本省境內又東經寶雞縣南一里汧水自北來注又東經岐山縣南三十里又東經郿縣北三里又東經西安府盩厔縣北五里漳漆二水自北來注韋谷強谷觀音渠三水自西南來注駱谷黑水田谷赤谷四水自東南來注又東經興平縣南二十里耿谷甘谷二水自南來注經鄠縣北三十里又東經咸陽縣南一里潦水泥渠水自西南來注灃水自東南來注經長安縣北三十里又東經咸寧縣北三十里澧灞水自東南來注又東經高陵縣南十里涇水自西南來注洪沙渠自西北來注經臨潼縣北十五里水磴潼臨三水自西南來注戲水市谷水自東南來注漆沮清谷三水自西北來注又東經渭南縣北一里冷水杜化谷水澹水自西南來注明光谷西陽大赤三水自東南來注又東入府境經華州北十五

里赤水仙橋水石隄水自西南來注太平水自南來注羅紋水疎水構峪水自東南來注經大荔縣南二十五里又東經華陰縣北二十里蔥谷水敷水良餘水黃酸水仙谷水自西南來注長澗小澗大澗水自南來注蒲谷水小月溝水自東南來注遂入縣境自縣西南隅四十五里韋林局所轄之仁義村西南來東流北三十里北距縣城三十里至永清局望仙觀南入河其水寬淺可行中等之船然其勢日北侵沒民莊田已甚矣夫

洛水發源甘肅慶陽府合水縣白於山東南流入省境經延安府保安縣西百里又南經安塞縣西北百二十里又西南經甘泉縣西百步又東南經鄜州東百步一名洛交水又名三川水又南經洛川縣西南七十里又南經中部縣東北三十五里又南經宜君縣北八十里又東南入府境經白水縣東三十里鐵牛水自西北來注孔走水自東北來注又東南經澄城縣西二十里既安城南水洞子崖水長寧水自東北來注白水自南來注浴子水自東來注又南經蒲城縣東四十里甘泉水大谷水自東北來注又西南轉東南經大荔縣西南五里又東入縣境自

縣西微南二十二里伯士局所轄趙家莊西來東南流經饒益安良二局三十五里北距縣城十里更南至趙渡鎮南入河其水但行小船恆不用棹僅以繩引耳金水更纖泉細派發源邵陽縣西北壺梯山東南流入縣境自縣東北隅五十五里大定局所轄之洿谷村來邑令朱廷模志引春秋左傳文公七年晉敗秦師於令狐至於列首云即洿谷未詳是否東南流十里至烏牛局所轄北延壽村東入河蓋夏或猛漲爲害而冬則極微者也

道路

縣城東路至黃河心十里又東渡河至嚴家莊十里又東過舊大慶關至山西蒲州府十里西路踰華原山至焦家莊十里又西踰紫陽山至高城村十里又西至同州府十里南路渡洛水至沙苑十里又南經沙苑至泊村十里又南至倉西村十里又南渡渭水至東柵村十里接華陰界北路上朝坂至隄澚村十里又北至魯坡村十里又北至寄樓村十里又北至兩女鎮十里又北踰廉山至葫蘆莊十里接邵陽界

物產

動物 畜有馬牛 縣境不足全賴他境 犬羊豕雞 魚有魴鯉

製造皮衣皮繩 略給家用

植物 木有榆柳槐柏 果有桃杏棗柿梨 藥有麻黃香附柴胡防風無多

蔬有蔥韭芥菘蒜葍蘿葡紅藷落花生 蔬有西瓜瓠瓜 穀有麥豆穀

糜自食時不足 服有木棉 絲甚少

製造棉布 僅自給

鑛物 無

商務

向無大商近年惟所出之棉花尙可成莊北路運至宜君洛川西路運至寶雞虢鎮衰旺無恆皆外來客自行運販每歲約出三十餘萬斤 陸運